



**ՀԱՅԱՍՏԱՆԻ ՀԱՆՐԱՊԵՏՈՒԹՅԱՆ  
ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ ՔՆՆՈՂ ԱՆՁ**

ք. Երևան

28.10.2021թ.

**Ո Ր Ո Շ ՈՒ Մ  
ՀՀ ԳՆՈՒՄՆԵՐԻ ՀԵՏ ԿԱՊՎԱԾ ԲՈՂՈՔՆԵՐ  
ՔՆՆՈՂ ԱՆՁԻ  
թիվ ԱՑ-ԼՕ-2021/269**

Նախագահությամբ՝ ՀՀ գնումների հետ կապված բողոքներ քննող անձ Լ. Օհանյանի  
Քարտուղարությամբ՝ Ռ. Մկրտչյանի

Պատվիրատու՝ Եղվարդի համայնքապետարան  
Մասնակից՝ «Գոռ Շեկոյան» Ա/Ձ

Մասնակցությամբ՝ Գոռ Շեկոյանի

Գնման ընթացակարգի ծածկագիրը և առարկան՝  
«ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդ, գույքի ձեռքբերում

ՀՀ գնումների հետ կապված բողոքներ քննող անձը (այսուհետ նաև՝ Բողոքներ  
քննող անձ), ուսումնասիրելով Հայաստանի Հանրապետության ֆինանսների  
նախարարության կողմից 28.09.2021թ.-ի թիվ 26/26-1/15738-2021 գրությամբ «Գոռ  
Շեկոյան» Ա/Ձ-ին (այսուհետ նաև՝ Մասնակից) գնումների գործընթացին մասնակցելու  
իրավունք չունեցող մասնակիցների ցուցակում ներառելու նպատակով նախաձեռնված  
ընթացակարգով ներկայացված հիմքերը,

**Պ Ա Ր Զ Ե Ց**

## **1. Գործի նախապատմությունը.**

ՀՀ ֆինանսների նախարարությունը, Եղվարդի համայնքապետարանի (այսուհետ նաև՝ Պատվիրատու) 23.09.2021թ. թիվ 1772 գրության հիման վրա, 28.09.2021թ.-ին «Գոռ Շեկոյան» ԱԶ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնել է ընթացակարգ՝ Բողոքներ քննող անձին ներկայացնելով համապատասխան հիմքեր:

Բողոքներ քննող անձին գործը մակագրվել է 28.09.2021թ.-ին:

30.09.2021թ.-ին [www.gnumner.am](http://www.gnumner.am) կայքում հրապարակված հայտարարությամբ գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգը ընդունվել է վարույթ և տրվել է թիվ ԱՑ-ԼՕ-2021/216 համարի ծածկագիրը:

12.10.2021թ.-ին և 28.10.2021թ.-ին նշանակվել և հրավիրվել են նիստեր:

Գործի քննությունն ավարտվել է 12.10.2021թ.-ին և Բողոքներ քննող անձի որոշման հրապարակման օր է նշանակվել 28.10.2021թ.-ին:

## **2. Եղվարդի համայնքապետարանի ներկայացրած փաստերը և դիրքորոշումը.**

Եղվարդի համայնքապետարանը 23.09.2021թ. թիվ 1772 գրությամբ դիմել է ՀՀ ֆինանսների նախարարությանը՝ հայտնելով հետևյալը.

*«Հայրնում ենք Ձեզ այն մասին, որ Եղվարդի համայնքապետարանը 2021թվականի օգոստոսի 9-ին «ԿՄԵՔ-ԷԱՃԱՊՁԲ-21/1» ծածկագրով գույքի ձեռքբերման նպատակով հայտարարել է էլեկտրոնային աճուրդ: 2021թվականի օգոստոսի 18-ին ինքնաշխատ եղանակով «ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդի N3 չափաբաժնի (հանդիսությունների սեղան աթոռներով (մեկ սեղան 2 աթոռ)) մասով ընտրված մասնակից է ճանաչվել Գոռ Շեկոյան ԱԶ-ն: 2021թվականի օգոստոսի 18-ին ինքնաշխատ եղանակով «ԿՄԵՔ-ԷԱՃԱՊՁԲ-21/1» ծածկագրով ընթացակարգի պայմանագիր կնքելու որոշման մասին հայտարարությունը հրապարակվել է տեղեկագրում:*

*«Գնումների մասին» ՀՀ օրենքի 10-րդ հոդվածի համաձայն՝ անգործության ժամկետ է սահմանվում վերոնշյալ հայտարարությունը հրապարակելու օրվան հաջորդող օրվանից մինչև 10-րդ օրացուցային օրը ներառյալ ընկած ժամանակահատվածը (28.08.2021թ.):*

2021 թվականի օգոստոսի 30-ին, ի թիվս ընտրված մասնակիցների, Գոռ Շեկոյան ԱԶ-ին ծանուցվել է պայմանագիր կնքելու առաջարկը և կնքվելիք պայմանագրի նախագիծը:

«Գնումների մասին» ՀՀ օրենքի 36-րդ հոդվածի 3-րդ կետի համաձայն եթե ընտրված մասնակիցը պայմանագիր կնքելու մասին ծանուցումն և պայմանագրի նախագիծը ստանալուց հետո 10 աշխատանքային օրվա ընթացում չի ստորագրում պայմանագիրը և պատվիրատուին ներկայացնում որակավորման և պայմանագրի ապահովումները, ապա նա զրկվում է պայմանագիրը ստորագրելու իրավունքից: 13.09.2021թ.-ին լրացել է Գոռ Շեկոյան ԱԶ-ի կողմից պայմանագիր կնքելու ժամկետը, ուստի Գոռ Շեկոյան ԱԶ-ն զրկվում է պայմանագիր կնքելու իրավունքից:»:

Ելնելով վերոգրյալից և հիմք ընդունելով ՀՀ կառավարության 04.05.2017թ.-ի թիվ 526-Ն որոշմամբ հաստատված գնումների գործընթացի կազմակերպման կարգի 45-րդ կետի պահանջները, կից ներկայացվել է «ԿՄԵՔ-ԷԱՃԱՊԶԲ-21/1» ծածկագրով հայտարարված գնման ընթացակարգի շրջանակներում «Գոռ Շեկոյան» Ա/Զ-ի տվյալները՝ համապատասխան հիմքերով:

### **3. «Գոռ Շեկոյան» Ա/Զ-ի ներկայացրած փաստարկները և դիրքորոշումը.**

Բողոքներ քննող անձը 30.09.2021թ.-ին գրությամբ դիմել է «Գոռ Շեկոյան» Ա/Զ-ին՝ հնարավորություն տալով ՀՀ ֆինանսների նախարարության կողմից 28.09.2021թ.-ի թիվ 26/26-1/15738-2021 գրությամբ նախաձեռնված ընթացակարգի վերաբերյալ ներկայացնել գրավոր կարծիք:

Մասնակիցը ստանալով կարծիք հայտնելու վերաբերյալ գրությունը, ինչպես նաև ծանուցված լինելով նիստի տեղի, օրվա և ժամի մասին, ներկայացել է հրավիրված նիստերին՝ ներկայացնելով բանավոր դիրքորոշում նախաձեռնված ընթացակարգի հիմքերի և հիմնավորումների վերաբերյալ:

### **4. ՍՑ-ԼՕ-2021/269 ընթացակարգի քննության համար էական նշանակություն ունեցող փաստերը.**

Սույն գործի քննության համար էական նշանակություն ունեցող փաստերի համաձայն՝

i. Եղվարդի համայնքապետարանի կողմից գույքի ձեռքբերման նպատակով 10.08.2021թ.-ին հայտարարվել է «ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդի ընթացակարգ (այսուհետ նաև՝ Աճուրդ կամ Ընթացակարգ):

ii. Ընթացակարգին մասնակցելու նպատակով հայտ է ներկայացրել նաև «Գոռ Շեկոյան» Ա/Ձ-ն:

iii. «Գոռ Շեկոյան» Ա/Ձ-ն թիվ 1 հավելվածով՝ էլեկտրոնային աճուրդի ընթացակարգին մասնակցելու դիմում-հայտարարությամբ հայտարարել և հավաստել է, որ բավարարում է «ԿՄԵՔ-ԷԱՃԱՊՁԲ-21/1» ծածկագրով գնման ընթացակարգի հրավերով սահմանված մասնակցության իրավունքի պահանջներին և պարտավորվում ընտրված մասնակից ճանաչվելու դեպքում, ընթացակարգի հրավերով սահմանված կարգով և ժամկետում ներկայացնել որակավորման ապահովում:

iv. Ընթացակարգի գնահատող հանձնաժողովի (այսուհետ նաև՝ Հանձնաժողով) 18.08.2021թ.-ի նիստի թիվ 1 արձանագրության համաձայն՝ 3-րդ չափաբաժնի մասով ընտրված մասնակից է ճանաչվել «Գոռ Շեկոյան» Ա/Ձ-ն:

v. 18.08.2021թ.-ին պայմանագիր կնքելու նպատակով գնումների պաշտոնական տեղեկագրում՝ [www.gnumner.am](http://www.gnumner.am) կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն (այսուհետ նաև՝ Հայտարարություն):

vi. Հայտարարության համաձայն՝ գնման ընթացակարգի 3-րդ չափաբաժնի մասով ընտրած /հաղթող/ մասնակից է ճանաչվել «Գոռ Շեկոյան» Ա/Ձ-ն և սահմանվել է անգործության ժամկետ՝ 10 օրացուցային օր:

vii. Հանձնաժողովի 22.09.2021թ.-ի նիստի թիվ 3 արձանագրության 1.1-րդ և 1.2-րդ կետերի համաձայն՝ Եղվարդ համայնքի կարիքների համար գույքի ձեռքբերման նպատակով հայտարարված «ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդ ընթացակարգի 3-րդ չափաբաժնի (հանդիսությունների սեղան աթոռներով (մեկ սեղան 2 աթոռ)) մասով ընտրված մասնակից է ճանաչվել «Գոռ Շեկոյան» Ա/Ձ-ն: «ԿՄԵՔ-ԷԱՃԱՊՁԲ-21/1» ծածկագրով ընթացակարգի անգործության ժամկետը ավարտվել է 28.08.2021թ.-ին ժամը 00:00-ին, հաղթող ճանաչված մասնակից «Գոռ Շեկոյան» Ա/Ձ-ին պայմանագիր կնքելու ծանուցումը և կնքվելիք պայմանագրի նախագիծը ուղարկվել է 30.08.2021թ.-ին: «Գնումների մասին» ՀՀ օրենքի 36-րդ հոդվածի 3-րդ կետի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծը ստանալուց հետո 10 աշխատանքային օրվա ընթացքում չի ստորագրում պայմանագիրը և

պատվիրատուին ներկայացնում որակավորման և պայմանագրի ապահովումները, ապա նա զրկվում է պայմանագիրը ստորագրելու իրավունքից: 13.09.2021թ.-ին լրացել է «Գոռ Շեկոյան» Ա/Ձ-ի կողմից պայմանագիր կնքելու ժամկետը, ուստի Մասնակիցը զրկվում է պայմանագիր կնքելու իրավունքից:

viii. Նույն արձանագրության 1.3-րդ կետի համաձայն՝ Հանձնաժողովը, հաշվի առնելով նույն արձանագրության 1.1-րդ և 1.2-րդ կետերը, որոշել է «ԿՄԵԲ-ԷԱՃԱՊՁԲ-21/1» ծածկագրով էլեկտրոնային աճուրդ ընթացակարգի 3-րդ չափաբաժինը չկայտարարել չկայացած, և «Գոռ Շեկոյան» Ա/Ձ-ի վերաբերյալ փաստաթղթերը ներկայացնել ՀՀ ֆինանսների նախարարության՝ գնումների գործընթացին մասնակցելու իրավունք չունեցող մասնակիցների ցուցակում ներառելու համար:

## **5. Բողոքներ քննող անձի հիմնավորումները և եզրահանգումը.**

Բողոքներ քննող անձը լրիվ, օբյեկտիվ և բազմակողմանի հետազոտելով և գնահատելով սույն գործում առկա ապացույցները, և համադրելով դրանք գործով պարզված փաստական հանգամանքների հետ, հանգում է այն եզրակցության, որ ՀՀ ֆինանսների նախարարության կողմից 28.09.2021թ.-ի թիվ 26/26-1/15738-2021 գրությամբ «Գոռ Շեկոյան» Ա/Ձ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված ընթացակարգն ենթակա է բավարարման, հետևյալ պատճառաբանությամբ.

«Գնումների մասին» ՀՀ օրենքի (այսուհետ նաև՝ Օրենք) 6-րդ հոդվածի 1-ին մասի 6-րդ կետի «ա» և «բ» ենթակետերի համաձայն՝ ... մասնակիցն ընդգրկվում է գնումների գործընթացին մասնակցելու իրավունք չունեցող մասնակիցների ցուցակում, եթե խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, և որպես ընտրված մասնակից հրաժարվել է պայմանագիր կնքելուց:

Օրենքի 35-րդ հոդվածի 1-ին մասի համաձայն՝ պայմանագրի ապահովում ներկայացնելու պահանջի հիման վրա այն ստանալու օրվանից 10 աշխատանքային օրվա ընթացքում ընտրված մասնակիցը պարտավոր է ներկայացնել պայմանագրի ապահովում: Ընտրված մասնակցի հետ պայմանագիր կնքվում է, եթե վերջինս ներկայացնում է պայմանագրի ապահովում:

Օրենքի 36-րդ հոդվածի 3-րդ մասի համաձայն՝ եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին ներկայացնում պայմանագրի ապահովումը, ապա նա զրկվում է պայմանագիրն ստորագրելու իրավունքից:

«Կառավարության 18.05.2017թ.-ի թիվ 534-Ն հաստատված «Գնումների գործընթացի կազմակերպման» կարգի 10-րդ կետի համաձայն՝ էլեկտրոնային աճուրդով գնումների կատարման և ընտրված մասնակցի հետ պայմանագրի կնքման ժամանակ գործում են Հայաստանի Հանրապետության կառավարության 2017 թվականի մայիսի 4-ի թիվ 526-Ն որոշման 1-ին կետի 1-ին ենթակետով հաստատված կարգով նախատեսված կարգավորումները.....:

«Կառավարության 04.05.2017թ.-ի թիվ 526-Ն որոշմամբ հաստատված «Գնումների գործընթացի կազմակերպման» կարգի (այսուհետ նաև՝ Կարգ) 32-րդ կետի 12-րդ և 13-րդ ենթակետերի համաձայն՝ ընտրված մասնակցին պայմանագիր կնքելու առաջարկը և կնքվելիք պայմանագրի նախագիծը հանձնաժողովի քարտուղարը տրամադրում է էլեկտրոնային եղանակով: Ապրանքների գնման դեպքում պայմանագրի նախագիծում ներառվում է ընտրված մասնակցի կողմից հայտով ներկայացված ապրանքի ամբողջական նկարագիրը: Ընտրված մասնակցի կողմից հաստատված պայմանագրի նախագիծը պատվիրատուին ներկայացվում է գրավոր, և դա ներկայացնելու գրությունը հաշվառվում է պատվիրատուի փաստաթղթաշրջանառության համակարգում: Պատվիրատուի ղեկավարի կողմից պայմանագրի նախագիծը հաստատվում է այդ իրավասության առաջացմանը հաջորդող երկու աշխատանքային օրվա ընթացքում:

Նույն կետի 19-րդ ենթակետի համաձայն՝ հրավերով նախատեսվում է նաև, որ եթե մասնակցի՝ հրավերով նախատեսված գնումներին մասնակցելու իրավունք ունենալու մասին հավաստումը որակվում է որպես իրականությանը չհամապատասխանող, կամ մասնակիցը հրավերով սահմանված կարգով և ժամկետներում չի ներկայացնում հրավերով նախատեսված փաստաթղթերը կամ ընտրված մասնակիցը չի ներկայացնում որակավորման ապահովումը, ապա այդ հանգամանքը համարվում է որպես գնման գործընթացի շրջանակում ստանձնված պարտավորության խախտում:

Կարգի 45-րդ կետի համաձայն՝ Օրենքի 6-րդ հոդվածի 1-ին մասի 6-րդ կետով նախատեսված հիմքերն ի հայտ գալու օրվան հաջորդող հինգ աշխատանքային օրվա ընթացքում պատվիրատուն տվյալ մասնակցի տվյալները՝ համապատասխան հիմքերով,

գրավոր ուղարկում է լիազորված մարմին, որը դրանք ստանալուն հաջորդող 5 աշխատանքային օրվա ընթացքում նախաձեռնում է տվյալ մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու ընթացակարգ:

Կարգի 50-րդ կետի համաձայն՝ ընտրված մասնակցի հետ պայմանագիրը կնքվում է օրենքի 10-րդ և 36-րդ հոդվածներով նախատեսված կարգով, եթե ներկայացվել է նաև որակավորման ապահովումը հիմնավորող փաստաթուղթը: Ընդ որում, ապրանքների գնման դեպքում ապրանքի ամբողջական նկարագիրը պայմանագրում ներառվում է՝ համաձայն ընտրված մասնակցի կողմից ներկայացված և գնահատող հանձնաժողովի կողմից բավարար գնահատված առաջարկի:

Վերոնշյալ դրույթների համակարգված վերլուծության արդյունքում Բողոքներ քննող անձը փաստում է, որ ընտրված մասնակիցը, հանձնաժողովի քարտուղարի կողմից էլեկտրոնային եղանակով ստանալով պայմանագիր կնքելու մասին ծանուցումը և պայմանագրի նախագիծը, պարտավոր է 10 աշխատանքային օրվա ընթացքում պատվիրատուին ներկայացնել իր կողմից հաստատված պայմանագրի նախագիծն, որակավորման և պայմանագրի կատարման ապահովումը:

Ընդ որում, եթե ընտրված մասնակիցը պայմանագիր կնքելու մասին ծանուցումը և պայմանագրի նախագիծն ստանալուց հետո՝ 10 աշխատանքային օրվա ընթացքում, չի ստորագրում պայմանագիրը և պատվիրատուին չի ներկայացնում ներկայացված գնային առաջարկի չափով որակավորման ապահովում, ապա այդ հանգամանքը համարվում է որպես գնման գործընթացի շրջանակում ստանձնած պարտավորության խախտում, ինչպես նաև չներկայացնելով պայմանագրի ապահովում, վերջինս զրկվում է պայմանագիրը ստորագրելու իրավունքից:

Նման դեպքում առաջանում է «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթների կիրառման անխուսափելիությունը, քանի որ Մասնակիցն իր գործողություններով կամ անգործությամբ, խախտելով գնման գործընթացի շրջանակում ստանձնած պարտավորությունը, հանգեցնում է Պատվիրատուի կողմից գնման գործընթացին տվյալ մասնակցի հետագա մասնակցության դադարեցմանը, ինչպես նաև վերջինիս գործողությունները (անգործությունը) գնահատվում են որպես պայմանագիր կնքելուց ընտրված մասնակցի կողմից հրաժարում:

Վերը շարադրվածից ելնելով՝ մասնակիցը պետք է ընդգրկվի գնումների գործընթացին մասնակցելու իրավունք չունեցող մասնակիցների ցուցակում երկու տարի

ժամկետով, քանի որ խախտել է գնման գործընթացի շրջանակում ստանձնած պարտավորությունը՝ հրավերով սահմանված կարգով և ժամկետում չներկայացնելով որակավորման ապահովում, որն էլ հանգեցրել է գնման գործընթացին տվյալ մասնակցի հետագա մասնակցության դադարեցմանը, ինչպես նաև պատվիրատուին չներկայացնելով պայմանագրի օրինակը և/կամ ապահովումը զրկվել է պայմանագիր կնքելու իրավունքից:

Սույն գործի փաստերի հիման վրա՝ Բողոքներ քննող անձն արձանագրում է, որ Եղվարդի համայնքապետարանի կողմից գույքի ձեռքբերման նպատակով 10.08.2021թ.-ին հայտարարված «ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդի ընթացակարգի գնահատող հանձնաժողովի 18.08.2021թ.-ի նիստի թիվ 1 արձանագրությամբ արձանագրվել է, որ 3-րդ չափաբաժնի մասով նվազագույն գնային առաջարկ է ներկայացրել «Գոռ Շեկոյան» Ա/Ձ-ն, և վերջինիս հայտը գնահատվել է բավարար, ինչով պայմանավորված 18.08.2021թ.-ին պայմանագիր կնքելու նպատակով գնումների պաշտոնական տեղեկագրում՝ [www.gnumner.am](http://www.gnumner.am) կայքում, Հանձնաժողովի կողմից հրապարակվել է պայմանագիր կնքելու որոշման մասին հայտարարություն, որի համաձայն՝ գնման ընթացակարգի 3-րդ չափաբաժնի մասով ընտրած /հաղթող/ մասնակից է ճանաչվել «Գոռ Շեկոյան» Ա/Ձ-ն և սահմանվել է անգործության ժամկետ՝ 10 օրացուցային օր: Սակայն Հանձնաժողովի 22.09.2021թ.-ի նիստի թիվ 3 արձանագրությամբ արձանագրվել է, որ Եղվարդ համայնքի կարիքների համար գույքի ձեռքբերման նպատակով հայտարարված «ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդ ընթացակարգի 3-րդ չափաբաժնի (հանդիսությունների սեղան աթոռներով (մեկ սեղան 2 աթոռ)) մասով ընտրված մասնակից է ճանաչվել «Գոռ Շեկոյան» Ա/Ձ-ն: «ԿՄԵՔ-ԷԱՃԱՊՁԲ-21/1» ծածկագրով ընթացակարգի անգործության ժամկետը ավարտվել է 28.08.2021թ.-ին ժամը 00:00-ին, հաղթող ճանաչված մասնակից «Գոռ Շեկոյան» Ա/Ձ-ին պայմանագիր կնքելու ծանուցումը և կնքվելիք պայմանագրի նախագիծը ուղարկվել է 30.08.2021թ.-ին, իսկ 13.09.2021թ.-ին լրացել է «Գոռ Շեկոյան» Ա/Ձ-ի կողմից պայմանագիր կնքելու ժամկետը, ուստի Մասնակիցը զրկվում է պայմանագիր կնքելու իրավունքից: Հանձնաժողովը, հաշվի առնելով նույն արձանագրության 1.1-րդ և 1.2-րդ կետերը, որոշել է «ԿՄԵՔ-ԷԱՃԱՊՁԲ-21/1» ծածկագրով էլեկտրոնային աճուրդ ընթացակարգի 3-րդ չափաբաժինը չկայտարարել չկայացած, և «Գոռ Շեկոյան» Ա/Ձ-ի վերաբերյալ փաստաթղթերը ներկայացնել ՀՀ ֆինանսների նախարարության՝ գնումների գործընթացին մասնակցելու իրավունք չունեցող մասնակիցների ցուցակում ներառելու համար:



Օրենքի 6-րդ հոդվածի 1-ին մասի 6-րդ ենթակետի համաձայն՝ գնումների ընթացակարգերին մասնակցելու իրավունք չունեն այն անձինք՝ որոնք հայտը ներկայացնելու օրվա դրությամբ ներառված են գնումների գործընթացին մասնակցելու իրավունք չունեցող մասնակիցների ցուցակում: Մասնակիցն ընդգրկվում է նշված ցուցակում, եթե՝

ա. խախտել է պայմանագրով նախատեսված կամ գնման գործընթացի շրջանակում ստանձնած պարտավորությունը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը,

բ. որպես ընտրված մասնակից հրաժարվել է պայմանագիր կնքելուց,

գ. հայտերը բացելուց հետո հրաժարվել է գնման գործընթացին հետագա մասնակցությունից:

Նշված իրավանորմերի վերլուծության հիման վրա՝ Բողոքներ քննող անձն եզրահանգում է, որ օրենսդիրը մասնակցին գնումների գործընթացին մասնակցելու իրավունք չունեցող մասնակիցների ցուցակում ներառելու համար նախատեսել է սպառիչ պայմաններ, որոնք են պայմանագրով նախատեսված կամ գնման գործընթացի շրջանակում ստանձնած պարտավորությունների խախտումը, որը հանգեցրել է պատվիրատուի կողմից պայմանագրի միակողմանի լուծմանը կամ գնման գործընթացին տվյալ մասնակցի հետագա մասնակցության դադարեցմանը, որպես ընտրված մասնակից պայմանագիր կնքելուց հրաժարվելը և հայտերը բացելուց հետո գնման գործընթացին հետագա մասնակցությունից հրաժարվել: Այսինքն՝ միայն սույն դեպքերում է հնարավոր մասնակցին ներառել գնումների գործընթացին մասնակցելու իրավունք չունեցող մասնակիցների ցուցակում:

Ընդ որում, Բողոքներ քննող անձը հարկ է համարում փաստել, որ «Գոռ Շեկոյան» Ա/Ձ-ն թիվ 1 հավելվածով՝ էլեկտրոնային աճուրդի ընթացակարգին մասնակցելու դիմում-հայտարարությամբ հայտարարել և հավաստել է, որ բավարարում է «ԿՄԵԲ-ԷԱՃԱՊՁԲ-21/1» ծածկագրով գնման ընթացակարգի հրավերով սահմանված մասնակցության իրավունքի պահանջներին և պարտավորվում ընտրված մասնակից ճանաչվելու դեպքում, ընթացակարգի հրավերով սահմանված կարգով և ժամկետում ներկայացնել որակավորման ապահովում:

Վերոնշյալներով պայմանավորված՝ Բողոքներ քննող անձը հանգում է այն եզրակացության, որ «Գոռ Շեկոյան» Ա/Ձ-ն, որպես ընտրված /հաղթող/ մասնակից,

հրավերով սահմանված կարգով և ժամկետներում չներկայացնելով պայմանագիրը, որակավորման և պայմանագրի կատարման ապահովումները, խախտել է գնման գործընթացի շրջանակում ստանձնած պարտավորություն, ինչպես նաև հրաժարվել է պայմանագրի կնքելուց:

Ուստի, հիմք ընդունելով «Գնումների մասին» ՀՀ օրենքի 6-րդ հոդվածի 1-ին մասի 6-րդ կետի «ա» և «բ» ենթակետերի դրույթները, Մասնակցին պետք է ընդգրկել գնումների գործընթացին մասնակցելու իրավունք չունեցող մասնակիցների ցուցակում 2 (երկու) տարի ժամկետով:

Ելնելով վերոգրյալից և ղեկավարվելով «Գնումների մասին» ՀՀ օրենքի 50-րդ հոդվածի 7-րդ մասով՝ ՀՀ գնումների հետ կապված բողոքներ քննող անձը.

### **Ո Ր Ո Շ Ե Ց**

1. ՀՀ ֆինանսների նախարարության կողմից 28.09.2021թ.-ի թիվ 26/26-1/15738-2021 գրությամբ «Գոռ Շեկոյան» Ա/Զ-ին գնումների գործընթացին մասնակցելու իրավունք չունեցող մասնակիցների ցուցակում ներառելու նպատակով նախաձեռնված թիվ ՍՑ-ԼՕ-2021/269 ծածկագրով ընթացակարգը բավարարել:

2. «Գոռ Շեկոյան» Ա/Զ-ին ընդգրկել գնումների գործընթացին մասնակցելու իրավունք չունեցող մասնակիցների ցուցակում 2 (երկու) տարի ժամկետով:

ՀՀ գնումների հետ կապված բողոքներ քննող անձի ընդունած որոշումն ուժի մեջ է մտնում այն տեղեկագրում հրապարակելուն հաջորդող օրը:

ՀՀ գնումների հետ կապված բողոքներ քննող անձի ընդունած որոշումն իրավապարտադիր է, որը կարող է փոփոխվել կամ վերացվել, այդ թվում՝ մասնակի, միայն դատարանի կողմից:

**ՀՀ ԳՆՈՒՄՆԵՐԻ ՀԵՏ ԿԱՊՎԱԾ  
ԲՈՂՈՔՆԵՐ ՔՆՆՈՂ ԱՆԶ՝**



**ԼԵՎՈՆ ՕՀԱՆՅԱՆ**